

PRIJEDLOG

U skladu sa članom 24. i 28. Zakona o principima lokalne samouprave u Federaciji Bosne i Hercegovine („Sl. Novine FBiH“ broj: 49/06 i 51/09), članom 59. do 77. Statuta Općine Travnik (prečišćeni tekst „Sl. novine Općine Travnik“ broj: 11/05) i Odlukom o organizaciji i funkcionisanju mjesnih zajednica na području Općine Travnik („Sl. novine Općine Travnik“ broj: 8/2001), na prijedlog Savjeta Mjesne zajednice Kalibunar, Skupština MZ na sjednici održanoj dana _____, 2020. godine **u s v a j a**

STATUT Mjesne zajednice Kalibunar

I – OPĆI DIO

Član 1.

Statutom mjesne zajednice Kalibunar (u daljem tekstu MZ Kalibunar), u skladu sa zakonom i Statutom Općine Travnik, uređuje se: postupak osnivanja mjesne zajednice, područje koje obuhvata, nadležnost MZ, organi MZ i njihova nadležnost, način njihova izbora i opoziva, način finansiranja djelatnosti MZ, postupak provođenja lokalnoga referenduma, odnos prema Općini i njenim organima, kao i odnos prema pravnim licima na području MU, te druga pitanja značajna za organizaciju i rad.MZ.

Član 2.

Statutarnom odlukom definišu se aktuelna pitanja iz nadležnosti MZ koja pobliže nisu uređena Statutom MZ (odluka o teritorijalnoj, nacionalnoj i dr. strukturi organa i sl.).

II – MZ KALIBUNAR – PRAVNO LICE

Član 3.

MZ Kalibunar ima svojstvo pravnog lica u okviru prava i dužnosti utvrđenih Zakonom o principima lokalne samouprave i drugim zakonima, Statutom Općine Travnik i ovim Statutom.

Član 4.

Mjesna zajednica ima svoj Statut i pečat.

Pečat MZ Kalibunar je u obliku kruga, prečnika 30 milimetara, sa tekstom ispisanim latinicom u koncentričnom krugu: **OPĆINA TRAVNIK – MJESNA ZAJEDNICA** i tekstom u sredini pečata: **KALIBUNAR br.32.**

Član 5.

Pečat MZ Kalibunar upotrebljava i čuva predsjednik Savjeta, a u njegovoj odsutnosti predsjednik Skupštine ili lice iz sastava Savjeta MZ Kalibunar, koje pismenim aktom ovlasti.

U posebnim slučajevima pečat se upotrebljava i čuva na način određen posebnim aktom općinske službe nadležne za poslove rada mjesnih zajednica.

Član 6.

MZ Kalibunar ima Statut, koji na prijedlog Savjeta usvaja Skupština MZ, a izuzetnim slučajevima prijedlog za usvajanje Statuta može podnijeti i općinska služba nadležna za poslove rada MZ.

Statut MZ Kalibunar je usvojen ako je za njega glasala većina izabranih članova Skupštine MZ.

III – POSTUPAK OSNIVANJA MZ

Član 7.

Mjesnu zajednicu osnivaju građani na zborovima građana pojedinih mjesnih područja, a inicijativu za osnivanje mjesne zajednice mogu podnijeti: građani, njihove organizacije i udruženja, općinski načelnik i Općinsko vijeće Travnik.

Konačnu odluku o osnivanju mjesne zajednice donosi Općinsko vijeće Travnik.

Član 8.

O prijedlogu za osnivanje mjesne zajednice glasa se na zborovima građana ulica, naselja i naseljenih mjesta za koje se osniva mjesna zajednica.

Glasanje na zborovima građana se provodi javno.

Odluka o osnivanju mjesne zajednice je prihvaćena ako je za nju glasala natpolovična većina birača upisanih u birački spisak ulica, naselja i naseljenih mjesta za čije područje se osniva mjesna zajednica.

Član 9.

Prilikom osnivanja MZ osnivački odbor priprema Statut mjesne zajednice i druge akte MZ, organizuje i provodi izbore za Skupštinu i Savjet mjesne zajednice najkasnije u roku od 60 dana od dana donošenja odluke o osnivanju mjesne zajednice.

IV - PODRUČJE MZ KALIBUNAR

Član 10.

Mjesna zajednica Kalibunar obuhvata područje naseljenih mjesta, naselja i ulica: Bilića Dočić, Bilići, Derviš efendije Korkuta, Grge Novaka, Jankovići, Jedikovac, Kacijan, Lovrići, Meljanac, Muhameda Kulenovića, Ovčarevo, Radića brdo, Vjekoslava Karasa, Vlahovića Brijeg i Zagaj.

Granice rubnih naseljenih mjesta, naselja i ulica predstavljaju granicu MZ Kalibunar sa susjednim mjesnim zajednicama.

Sjedište MZ Kalibunar je u Ulici Derviš efendije Korkuta, Općina Travnik.

Član 11.

U interesu bolje organizacije rada unutar MZ Kalibunar se osnivaju mjesna područja:

1. Ovčarevo sa pripadajućim naseljenim mjestima, naseljima i ulicama: Bilića Dočić, Bilići, Lovrići, Radića brdo, Vlahovića Brijeg i Zagaj,
2. Jankovići sa pripadajućim naseljenim mjestima, naseljima i ulicama: Jankovići i Jedikovac,
3. Kalibunar 1 sa pripadajućim ulicama: Derviš efendije Korkuta,
4. Kalibunar 2 sa pripadajućim ulicama: Kalibunar, (područje Grozdovi i naselje do Bolnice) ,
5. Kalibunar 3 sa pripadajućim ulicama: Grge Novaka, Muhameda Kulenovića (i dio zv. Vlašička) i Vjekoslava Karasa,
6. Meljanac (Mali niz) sa pripadajućim ulicama: Meljanac i Kacijan.

Mjesna područja su sjedišta zborova građana i imaju status izbornih jedinica unutar MZ Kalibunar.

VI – NADLEŽNOSTI MZ

Član 12.

MZ Kalibunar svoja prava i dužnosti ostvaruje u skladu sa Zakonom, Statutom Općine Travnik, Odlukom o organizaciji i funkcionisanju mjesnih zajednica na području Općine Travnik i Statutom MZ Kalibunar.

Član 13.

U okviru prava i dužnosti MZ Kalibunar je nadležna za obavljanje poslova koji neposredno utiču na svakodnevne potrebe građana:

1. raspisivanje referenduma za područje MZ,
2. pokretanje i učešće u javnoj raspravi o Budžetu Općine Travnik,
3. pripreme i donošenja urbanističkih planova za području mjesne zajednice,
4. pokretanje i učešće u raspravama o inicijativama i aktivnostima za razvoj privrede i društvenih djelatnosti,
5. izgradnju i održavanje puteva, kanalizacije, vodovoda, rasvjete i drugih komunalnih potreba,
6. uređenje naselja, izgradnju i održavanje parkova, dječijih igrališta, sportskih objekata i dr.,
7. izgradnju i održavanje grobalja i mezarja,
8. čišćenje javnih površina, odvoz smeća, odvođenje atmosferskih voda i zaštitu okoliša,
9. obavljanje i drugih lokalnih poslova od interesa za život i rad građana u mjestu stanovanja, određene Statutom MZ, Zakonom, Statutom Općine Travnik i drugim propisima Općine.

VII – ORGANI MZ, NADLEŽNOSTI I NAČIN IZBORA

Član 14.

Organi mjesne zajednice, njihova nadležnost i međusobni odnosi definisani su Statutom MZ Kalibunar, kojeg na prijedlog Savjeta usvaja Skupština MZ.

U uslovima privremenog nefunkcionisanja Savjeta MZ prijedlog Statuta Skupštini može pripremiti i podnijeti općinska služba nadležna za poslove rada mjesnih zajednica.

Statut mjesne zajednice je usvojen ako je za njega glasala većina delegata izabranih u Skupštinu MZ Kalibunar.

Član 15.

Organi MZ Kalibunar su: zborovi građana, Skupština i Savjet MZ

a) Zbor građana MZ Kalibunar

Član 16.

Zbor građana je neposredan oblik odlučivanja građana, na kojem se odlučuje o pitanjima od značaja za život i rad, te o zajedničkim interesima i potrebama mjesnog područja.

Zbor građana može davati inicijative, prijedloge i mišljenja za rješavanje određenih pitanja iz nadležnosti Općinskog vijeća Travnik, te o nacrtima odluka i drugih dokumenata Općinskog vijeća.

Član 17.

Zbor građana mjesnog područja saziva i njime rukovodi predsjednik Skupštine MZ, a način rada i odlučivanja na zborovima građana detaljnije se uređuje Poslovníkom o radu zbora građana.

U izuzetnim slučajevima i u uslovima nefunkcionisanja organa MZ Kalibunar zbor građana može sazvati i istim rukovoditi ovlašteni predstavnik Općine Travnik.

Član 18.

Zborovi građana organizuju se u sljedećim mjesnim područjima:

7. Ovčarevo sa pripadajućim ulicama, naseljima i naseljenim mjestima: Bilića Dočić, Bilići, Lovrići, Radića brdo, Vlahovića Brijeg i Zagaj,
8. Jankovići sa pripadajućim ulicama, Naseljima i naseljenim mjestima: Jankovići i Jedikovac,
9. Kalinubar 1 sa pripadajućim ulicama: Derviš efendije Korkuta,
10. Kalibunar 2 sa pripadajućim ulicama: Kalibunar (područje Grozdovi i naselje do Bolnice),
11. Kalibunar 3 sa pripadajućim ulicama: Grge Novaka, Muhameda Kulenovića (i dio zv. Vlašička) i Vjekoslava Karasa,
12. Meljanac (Mali niz) sa pripadajućim ulicama: Meljanac i Kacijan.

Član 19.

Zborovi građana organizovani u mjesna područja imaju status izbornih jedinica unutar MZ Kalibunar.

Odluke na Zborovima građana donose se javnim glasanjem prisutnih, a usvojene su one odluke, zaključci, inicijative i sl. za koje je glasala natpolovična većina prisutnih.

b) Skupština MZ Kalibunar

Član 20.

Skupština MZ je organ mjesne zajednice u kojem građani posredno, preko izabranih delegata mjesnih područja, odlučuju o pitanjima od značaja za život i rad, te o zajedničkim interesima i potrebama mjesnih područja.

Skupština mjesne zajednice se formira na predstavničkom principu i broji 39 delegata, koji se biraju u mjesnim područjima proporcionalno broju birača na biračkom spisku tih područja.

Član 21.

Skupština mjesne zajednice nadležna je za obavljanje poslova koji neposredno utiču na svakodnevne potrebe građana za život i rad, kao što su:

1. raspisivanje referenduma području MZ o poslovima iz svoje nadležnosti,
2. izgradnja i održavanje puteva, kanalizacije, vodovoda i drugih komunalnih potreba,
3. uređenje naselja, izgradnja i održavanje parkova, nasada, dječijih igrališta te sportskih objekata i sl.,
4. izgradnja i održavanje grobalja,
5. čišćenje javnih površina, odvoz smeća, odvođenje atmosferskih voda i zaštita okoliša,
6. obavljanje i drugih lokalnih poslova od interesa za život i rad građana u mjestu stanovanja, određenih Statutom mjesne zajednice i općinskim propisima.

Član 22.

Skupštinu MZ Kalibunar čine delegati izabrani u mjesnim područjima na broj pozicija koje su Statutarnom odlukom MZ pripadaju tom mjesnom području.

Član 23.

Skupština iz reda delegata, natplovičnom većinom prisutnih delegata, bira predsjednika Skupštine, vodeći računa da predsjednik Skupštine i predsjednik Savjeta nisu iz istog mjesnog područja, niti iz reda istog konstitutivnog naroda i ostalih.

Kvorum za održavanje Skupštine MZ Kalibunar predstavlja natpolovična većina izabranih delegata Skupštine, a kvorum za odlučivanje natpolovična većina prisutnih, izuzev odlučivanja o pitanjima određenim članom 14. ovog Statuta.

Mandat delegata i predsjednika Skupštine traje dvije godine.

Član 24.

Predsjednik Skupštine MZ Kalibunar:

1. saziva sjednice Skupštine mjesne zajednice i predsjedava im,
2. predsjedava svim zborovima građana,
3. stara se o blagovremenom usvajanju Finansijskog plana i Godišnjeg finansijskog obračuna,
4. usmjerava rad Savjeta MZ,

5. u odsustvu predsjednika Savjeta predstavlja MZ, te obavlja i druge poslove iz svoje nadležnosti.

Član 25.

MZ Kalibunar ima i zamjenika predsjednika Skupštine, koji usljed opravdanog ili neopravdanog dužeg odsustva predsjednika Skupštine, nesazivanja sjednica Skupštine ili drugih opstrukcija iskazanih od strane predsjednika Skupštine, a koje su u suprotnosti sa interesima MZ Kalibunar i većini u Skupštini, u smislu sazivanja i vođenja sjednica Skupštine MZ ima ovlasti kao i predsjednik Skupštine.

c) Savjet MZ Kalibunar

Član 26.

Savjet MZ je organ mjesne zajednice u kojem građani posredno, preko izabranih članova savjeta iz mjesnih područja, odlučuju o pitanjima od značaja za život i rad, te o zajedničkim interesima i potrebama mjesnih područja.

Savjet MZ Kalibunar ima deset članova i predsjednika Savjeta, koji je po položaju član Savjeta MZ.

Član 27.

Sastav Savjeta MZ Kalibunar odražavat će približnu teritorijalnu, nacionalnu, polnu i drugu strukturu birača upisanih na centralnom biračkom spisku za područje MZ Kalibunar.

Sjednicama Savjeta MZ Kalibunar mogu prisustvovati i predsjednik Skupštine i njegov zamjenik, koji ima pravo diskusije po svim tačkama dnevnog reda, ali bez prava glasa.

Član 28.

Članove i predsjednika Savjeta MZ bira Skupština MZ Kalibunar tajnim glasanjem ili na drugi način utvrđen Statutom i odlukama Skupštine MZ.

Kvorum za održavanje sjednica Savjeta MZ Kalibunar predstavlja natpolovična većina izabranih članova Savjeta, a kvorum za odlučivanje natpolovična većina prisutnih.

Mandat članova i predsjednika Savjeta traje dvije godine.

Član 29.

Savjet mjesne zajednice:

1. donosi program rada, finansijski plan i godišnji obračun,
2. poslovnik o radu savjeta mjesne zajednice,
3. predlaže godišnji Plan rada i utvrđuje Izvještaj o radu, te obavlja i druge poslove koji su značajni za ostvarivanje zajedničkih interesa i potreba građana s područja MZ, utvrđenih statutom mjesne zajednice.

Član 30.

Predsjednik Savjeta MZ Kalibunar:

1. predstavlja MZ,

2. saziva sjednice Savjeta mjesne zajednice i predsjedava im,
3. izrađuje i provodi program rada i finansijski plan,
4. prati i koordinira akcije i planove MZ,
5. prati i koordinira realizaciju projekata Općine Travnik i drugih državnih organa i ustanova na području MZ Kalibunar,
6. stara se o izradi Finansijskog plana i Godišnjeg finansijskog obračuna, te obavlja i druge poslove utvrđene Statutom MZ.

Član 31.

Predsjednik Savjeta MZ Kalibunar je ujedno i predsjednik MZ i za svoj rad odgovara Savjetu i Skupštini MZ, a za obavljanje poslova iz samoupravnog djelokruga Općine, koji budu preneseni u nadležnost MZ odgovara općinskom načelniku.

Član 32.

Način rada, odlučivanja Skupštine i Savjeta MZ Kalibunar, te pitanja međusobnog odnosa i saradnje, koja nisu uređena ovim Statutom, uređuju se Poslovníkom o radu Skupštine i Savjeta MZ.

Prijedlog Poslovníka o radu Skupštine MZ izrađuje predsjednik Skupštine, a prijedlog Poslovníka o radu Savjeta predsjednik savjeta.

Član 33.

Za delegata i predsjednika Skupštine MZ, člana i predsjednika Savjeta MZ može biti izabran svaki građanin koji je stalno nastanjen na području MZ Kalibunar, ima biračko pravo i za kojeg postoje saznanja da nije pravosnažno osuđen na zatvorsku kaznu.

Za izabrane predstavnike MZ Kalibunar za koje se pojavi osnovana sumnja definisana u stavu jedan ovog člana, provest će se postupak ispitivanja i dokazivanja okolnosti i ako se u toku tih postupaka utvrdi postojanje pravosnažne presude, isti će po hitnom postupku biti razriješen dužnosti.

Član 34.

Odluku o razriješenju izabranog predstavnika MZ Kalibunar u uslovima propisanim članom 33. ovog Statuta mogu donijeti predsjednik Skupštine MZ i njegov zamjenik za članove skupštine, a za članove Savjeta predsjednik Savjeta ili najstariji član Savjeta MZ, te ih na prvoj narednoj sjednici Skupštine ili Savjeta staviti na potvrđivanje.

Član 35.

Predsjednik Skupštine i predsjednik Savjeta MZ Kalibunar ne mogu biti birani iz reda istog konstitutivnog naroda i reda ostalih.

Član 36.

Približna teritorijalna, nacionalna, polna i druge zastupljenosti mjesnih područja (naseljenih mjesta, naselja i ulica) u organima MZ Kalibunar definisat će se Statutarnom odlukom Skupštine MZ Kalibunar, svaki puta 60 kalendarskih dana prije raspisivanja izbora za organe MZ, te će se u formi Javnog poziva obznaniti biračima MZ.

VIII – POSTUPAK PROVOĐENJA LOKALNOG REFERENDUMA

Član 37.

Lokalni referendum može biti organizovan radi izjašnjavanja građana o pitanjima iz nadležnosti mjesne zajednice i pitanjima za koja izjašnjavanje zatraži Općine Travnik.

Način organizacije referenduma, način glasanja, zbrajanja i vrednovanja rezultata referenduma, uz suglasnost Općine Travnik, propisat će se posebnim pravilima MZ Kalibuna

Član 38.

Na lokalnom referendumu se izjašnjavaju građani upisani na Centralnom biračkom spisku za područje MZ Kalibunar.

Referendum se smatra uspješnim ako je izlaznost birača 50% plus jedan birač.

IX – ODNOS MZ PREMA OPĆINI TRAVNIK, PREDUZEĆIMA, USTANOVAMA I UDRUŽENJIMA

Član 39.

Organi MZ Kalibunar imaju obavezu saradnje sa nadležnim općinskim službama, načelnikom Općine i Općinskim vijećem po pitanjima iz njihove nadležnosti.

U pogledu prenesenih nadležnosti organi MZ Kalibunar ispunjavaju svoju ulogu i obavezu na način propisan odlukama Općinskog vijeća o prijenosu nadležnosti.

Član 40.

Organi MZ Kalibunar imaju obavezu pomagati rad udruženja građana, grupe građana, preduzeća i ustanova u realizaciji projekata i akcija od obostranog interesa.

X – FINANSIRANJE DJELATNOSTI MZ

Član 41.

Sredstva za finansiranje djelatnosti MZ Kalibunar osiguravaju se:

1. Lokalnim samodoprinom,
2. Sredstvima koja Općina ustupi mjesnoj zajednici za finansiranje određenih poslova,
3. Prihodom od radnji i preduzeća koje, u skladu sa zakonom, osniva mjesna zajednica,
4. Naknadama za usluge koje pruža mjesna zajednica,
5. Od poklona, donacija i drugih sredstava koja, u skladu sa zakonom i drugim propisima, ostvari mjesna zajednica

Član 42.

MZ Kalibunar donosi:

1. Program rada,
2. Finansijski plan mjesne zajednice,

3. Godišnji finansijski obračun,
4. Operativne planove i projekte sa finansijskim pokazateljima,
5. Liste materijalno – tehničkih sredstava, te druge materijalno – finansijske dokumente.

XI – NADZOR

Član 43.

Nadzor nad zakonitošću rada organa MZ Kalibunar obavljaju: Skupština i predsjednik Savjeta MZ, općinska služba nadležna za poslove rada MZ i općinski načelnik.

Općinski načelnik ima pravo i obavezu predložiti Općinskom vijeću da raspusti skupštinu MZ Kalibunar i savjet mjesne zajednice te da u roku od 30 dana raspiše nove izbore ako se utvrdi da u svom radu učestalo krše Statut MZ ili općinske propise ili ne obavljaju povjerene poslove.

Član 44.

Odredbe ovog Statuta usklađene su sa Zakona o principima lokalne samouprave u Federaciji Bosne i Hercegovine, Statutom Općine Travnik i Odlukom o organizaciji i funkcionisanju mjesnih zajednica na području Općine Travnik, isti je usvojen i stupa na snagu danom donošenja.

Statut MZ Kalibunar će se objaviti na Oglasnoj ploči i Web stranici MZ, a jedan primjerak će se dostaviti na čuvanje u Registar mjesnih zajednica Općine Travnik.

Travnik: 12.03.2020. godine

PREDSJEDNIK SKUPŠTINE
